

Headline	Kes bolot, pajak tapak niaga sukar dibuktikan		
MediaTitle	Berita Harian		
Date	08 Aug 2019	Color	Full Color
Section	Nasional	Circulation	82,252
Page No	5	Readership	246,756
Language	Malay	ArticleSize	401 cm ²
Journalist	Mohd Azrone Sarabatin	AdValue	RM 13,278
Frequency	Daily	PR Value	RM 39,834



Kes bolot, pajak tapak niaga sukar dibuktikan

Penyewa tidak mengaku miliki lot pasar ketika operasi pihak berkuasa

Oleh Mohd Azrone Sarabatin
azrone@bh.com.my

Kuala Lumpur: Kementerian Perumahan dan Kerajaan Tempatan (KPKT) sukar membuktikan kes individu memborong lot niaga pasar borong milik pihak berkuasa tempatan (PBT) dan kemudian disewakan kepada pihak ketiga.

Timbalan Menteri, Datuk Raja Kamarul Bahrin Shah Raja Ahmad Baharuddin Shah, berkata ini kerana ketika operasi penguatkuasaan undang-undang dijalankan, penyewa terbabit tidak mengakui lot perniagaan berkenaan milik mereka, sebaliknya mendakwa pekerja.



Keratan akhbar BH, semalam.

Beliau berkata, sistem pajakan atau memborong lot niaga juga sepatutnya tidak berlaku kerana setiap penyewa mempunyai kuota tertentu ditetapkan PBT mengikut permintaan di sesuatu kawasan.

Katanya, jika permintaan di kawasan berkenaan tinggi, kuota ditetapkan untuk seorang penyewa adalah sedikit bagi memastikan tidak berlaku kes pihak tertentu membolot lot perniagaan disediakan oleh PBT.

"Kuota berkenaan ditetapkan oleh PBT dan pihak berkuasa terbabit sepatutnya tidak membenarkan pihak tertentu memborong lot niaga sehingga menyebabkan pihak lain yang mahu berniaga terpaksa menyewa dengan mereka," katanya ketika dihubungi, semalam.

BH semalam melaporkan penguasaan pasaran ikan oleh kartel, kegiatan menyewa Permit Kelulusan (AP) kubis, jualan lot niaga borong sehingga RML3 juta,

kebergantungan kepada negara sumber yang terhad serta kekurangan produk tempatan, menjadi punca kenaikan harga lima bekal makanan utama rakyat negara ini.

Sebelum ini, BH mendedahkan kes warga asing berniaga di pasar borong, malah ada juga yang berniaga di luar kawasan pasar tani Lembaga Pemasaran Pertanian Persekutuan (FAMA).

Ditanya mengenai ada warga asing didakwa berniaga di kawasan pasar awam kendalian PBT di seluruh negara, Raja Kamarul Bahrin berkata perkara itu sepatutnya tidak berlaku.

Katanya, PBT hanya mengeluarkan lesen kepada warga tempatan dan menjadi kesalahan jika mereka mengeluarkannya kepada warga asing.

"Keadaan ini tidak sepatutnya berlaku dan ia adalah satu kesalahan, apatah lagi warga asing datang ke negara kita untuk bekerja mengikut permit kerja mereka mohon bukannya berniaga," katanya.



Kuota berkenaan ditetapkan oleh PBT dan pihak berkuasa terbabit sepatutnya tidak membenarkan pihak tertentu memborong lot niaga sehingga menyebabkan pihak lain yang mahu berniaga terpaksa menyewa dengan mereka.

Raja Kamarul Bahrin Shah
Raja Ahmad Baharuddin Shah,
Timbalan Menteri Perumahan dan Kerajaan Tempatan